

2 Kolini

Polo'a Masetonia maineno Kolini kumate maine'ya Yisasina amaku'a aminaya veafe havino mani avona kaeno amamine. Yisasi'a faliteno hetino ikapinaga haitegeno Polo'a tueti fo'a (24) kafu agava maineno 2 Kolini kea kaemalene.

¹ Nagaila Polonia Anumaya Koti'a hapalinateno Aposolo kano maiyo huno hunatene. Nelafu'a Timoti'ene mani avona negao'e.

Tamakai fe nehu'e. Tamakaya Anumaya Koti anagala Kolini kumate mainetama agai kema havigahe melitalu hutama nemaiya veafe'ene Akaiya kotega maine'ya Yisasife havi'ya amakupi malenaya vea'nenefe huta'a mani avona negao'e.

² Anumaya Koti'a Nelafa'ene Yisasi Kalaisi Anumayatimo'ene kayone yama'aene tamaipa falu hisia ya'ene tamamisa'e hu'na Anumayamotega havige'na mani avona negaove.

Anumaya Koti'a aya humainea yafe Polo'a huno muse hutene.

³ Musena hune'ateta Anumaya Koti agia alisaga nehuta maisune. Anumaya Koti'a Yisasi Kalaisina Nefa'agino kalagi aimate yamona aepa'a maineafe muki'a vea'mogatina taipamo'a kanale hisia yamona aepa'a nagoke maineanagino ani yana hunelate. ⁴ Tagaya muki'a kana yama alunageno'a Anumaya Koti'a taipa kanale hulatesia yana nelamie. Tamineafe tagaya ani'a huta nago'a vea'ma

kana yama falote humatesigeta Anumaya Koti'a tayama hia kava huta veala amaipa alita kanale humatesunafe tagaite'ma falote humainea avamete kana yana falote humaine. ⁵ Yisasi Kalaisite'ma kasago'ya kana yama falote humainea avamete huno tagaipina kana yana falote nehiafe Kalaisi'ene ailokaeta mainonanagino agaya tusiya huno taipamona alino kanale hunelate. ⁶ Tagaite'ma kana yama falote hisigeta tamakaifena, tagaya tamaipa ali kanale hulamatesuna yafe falote nehie. Tamakaila tamaku tamamema aligatisiafe falote nehie. Falote'ma hia kanafina Anumaya Koti'a taipamona alino kanale hulatesigeta tagaya tamaya hisunafe taipa alino kanale hunelate. Tagaite'ma falote humainea avamete kana yana tamakaya aligeno Anumaya Koti'a tamaya hinageno tamaipamo'a kanale hisigetama mailava hutama mai lokiya vaitama maigahae. ⁷ “Tokiya'age hu'ya maigahae.” huta tamakaifena tusiya huta tametitia nehune. Tagaite'enema kana yama folote hia kanafina Anumayamo'a tagaila taipa alino kanale hulatenea avamete huno tamakai tamaipa alino kanale hulamategahie huta nehune.

⁸ Esia kotega kana yama alimainona yafena nafu'naganatama hu'na lamakesa hugahe tamahapaigahue. Tusiya huno kana yana tagaipina falote higeta tokiya vaita maisuna tokiyatia omalegeta “Faligahune.” huta humainone. ⁹ Humainonanagi tagaya kanale'ya huta maisuna tokiyatia omaleneanagita ani

lokiyahena tametitia ohisunagi Anumaya Koti'a fali vaya'ma alino heti-ne'amatea kanomofe tametitia hisunafe ani avamete kana yana falote humaine. ¹⁰ Ani kotega tahaesageno tusi lagata aisigeta fali-mainesuna yapiti Anumaya Koti'a taugafa aligatiteno haenaga'a eteno nago'ene taugafa aligatigahie huta tametitia nehune. ¹¹ Tametitia nehunagi tamakaya laya hutama Anumayamotega ke hutama havigegenon laya hino. Taya hisige'ya muki'a vea'mo'ya anima taha'maesia yana agete'ya muki'a vea'mo'ya havigaya kema havisaya yafena Anumaya Kotina muse hutegahae.

Polo'a Kolini vea'nea havigea hamaopaine.

¹² Nagaya Yisasi kema nohaviya vea'nene tamakai'ene ailokae'na maine'na alu aotage kano mainogeno Anumaya Koti'a kayone yama'a namige'na fatago hu'na maine'na ma mopale havi'ya'ami hanea vaya'mogami ke kana kea nohue. Ani yafena nagesa havuana nagu'amo'a “Havi kava nehane.” huno ohia yafena muse nehue. ¹³⁻¹⁴ Nagi menia hapalitama havalama hisaya kege'ya avopina negaove. Menia muki'a aepa'nia havalama nohayanagi haenaga'a havalama hisae hu'na nametitia nehue. Yisasi Kalaisi'ma eteno esia yupa aepa'nia havalama hutetama tagaya tamakaifema muse nehuna avamete hutama tamakaya tagaifena musena hugahae.

¹⁵⁻¹⁶ Nagai'fena muse hugahae hu'na nametitia nehu'na Masetonia ugahe hagote'na mainesalega mo lamavatagige'na Masetoniatila ete'na

egahe tole yupa tamaya hugahe me lamakeme evisuafe nagaila naya hisae hu'na nagesa nehavue. ¹⁷ Ani kema hute'na o'u'nama mainoa yafena “Havige huno ayelavataga hie.” hutama tamakesa havimainao? Nagaya nagesa havi'na “Na'a ma'a hu'na ali'yana aligahue.” hute'na atafa naipamo haiya yafe “E.” hute'na haenaga “A'ao.” nehuo? A'ao na'a kavala nohue. ¹⁸ Anumaya Koti'a ago'ma humainea kea fatago huno hugahie. Nagai'enena fatago hu'na havigea ayelamavataga ohugahue. Tamahapai-mainoa kea nago yupa “E.” hute'na haenaga “A'ao.” hu'na ohunoane. ¹⁹ Yisasi Kalaisi'a Anumaya Koti nafa'nemo'a havige huno ayelavataga hisia kanoa omaine. Nago yupa “E.” huteno haenaga “A'ao.” huno ohuneane. Fatago kege'ya huno “E.” nehia kano maine. Sailasi'ene Timoti'ene nagai'niene tamakaipina Yisasi Kalaisi kea mo lamahapai-mainone. ²⁰ Tamahapaunageno Anumaya Koti'a “Hulamategahue.” huno hulokiya vai-malenea kemona aepa'a Yisasi'a agai'a maineanagino ani kekena “E, hulamategahue.” huno agai'a humaineafe Anumaya Kotifena “Tamage nehie.” huta nehuta agia alisaga nehune. ²¹ Agia alisaga nehunageno Anumaya Koti'a agai'a tavaleno tagai'ene tamakai'ene Kalaisi'ene aiga'maelateno “Tokiya waitama maiho.” huno hunelate. Ani kema huhaleta hisunafe tagaila hapalilatene. ²² Hapalilateno “Tamakaya nagai anaga mainae.” huno humainea kema havisaya yafe agai'a Avamula tagu'afina faetene. Faetegeni tagu'afina maineafe

tagayama havunana “Haenaga'a kanale'ya huta maigahune.” huta nehune.

Polo'a amakaitega aup'a uva'yi ohunea aep'a hamapai-mainae.

²³ Nagaya kelamama-kisugeno tamaipamo'a haviya huyafene hu'na Kolini kumatela nago'ene uva'yi ohunoe. Anumaya Koti'a nagesa havua yana ago havimaineanagi'na agai aufina tamage nehue. ²⁴ Tamakaya Anumayamofena havitama lamakupi maletama tamametiti humainaya kemonana atafa hutama tokiya'age hulinayafe menia kahegi kea huta kava hu notamatonagi muse hutama tamaipa kanale yapi maisayafe mani kea nehune.

2

¹ Tamakaitega ete'nama esuana kelamama-kisugetama tamaipa haviya huyafene hu'na nago'ene o'ugahue hu'na humainoe. ² Nagaya hisua kemo tamaipa ali haviya hisige'ya ta'ya nagaila muse yani'a namigahae? Tamakai tamaipa haviya hisia yama tamamisua vea'mogatamage muse yana namisaya vea'nea mainae. ³ Tamakaitegama visua yupa kea otamama-kisuafe mani avona ago kae'na tamaminoe. Tamakaya muse yama namisaya vea'ne mainagi havigu kelamama-kisua yamo tamaipa haviya hisigeno naipamo'ene haviya hu yafene hu'na aup'a omenoe. Tamahapai-mainoa kefo yana ago ali fatago hugahae hu'na nagaya musema hisua yana ailokaeta nagopi musena hugahune hu'na nehue. ⁴ Tusiya hu'na

tamakaifena nagesa nehavugeno naipamo'a kana'age nehige'na avi ne'ate'na ani avona ago kae'na tamaminoe. Tamaipa haviya hisie hu'na okaenogi “Tagaifena aluya huno haigeno mani avona lamie.” hutama hisayafene hu'na ani avona ago kae'na lamaminoe.

Kolini vea'mogatama kefo yama hisia kanomona aige'atetama kefo yama'a ataleteho.

⁵ Tokaetama mainaya vayapiti nago kanomo'ma kefo yama hia yafe naipa havi'na haviyama huana nagai'nigelomagi tamakai'ene muki'amogatamina tamaipamo'a tusiya huno haviya nehie. Haviya nehianagi ani yafena muki'a kea ohisua nagesa nehie. ⁶ Tamaipamo'a haviya higetama ani kanomona “Kefo ya nehane.” hutama havi anona'a hu ne'atayafe ani kefo yamo anona'a ago alimaine. ⁷ Alimaineafe aige'atetama kefo yama'a ataletetama aipa alitama kanale huteho. Havigu agaye yamo kana ya amisigi kanale kava huteho. ⁸ Alitama kanale hu ne'atetama “Kagaifena aluya huno nelahaiye.” hutama huteho hu'na tokiya'age ke nehue. ⁹ “Kanale'ya hutama muki'a ke'nia havitama akave nemalao ifi nomalao?” hu'na nagaya tamakaila avame hulamate'na ani avona ago kae'na lamaminoe. ¹⁰ Nago kanomona aige'atetama kefo yama'ama ataletesayana nagaya ani'a hu'na ani kanomona aige'ate'na kefo yama'a atalene'atoo. Nago kanomona aige'ate'nama kefo yama'a ataletooana tamakaifene hu'na Kalaisi aufina ani'a humainoe. ¹¹ Na'a ohisugeno'a Satani'a

ayelavataga huno tatafa hugahie. Agai'a havige huno ayelavataga hisia yafena ago havilinone.

Polo'a Taitasi agegahe humaine.

¹² Kalaisifena kanale mono kema huhale'na hugahema Taloasi kumate uva'yima hugeno'a Anumayamo'a anile mainaya vea'mogamina amaku'a alino aikalo hige'na kanale'ya hu'na ani kea huhale'na humainoe. ¹³ Huhale'na huanagi nenafu'a Taitasi'a omaige'na agaife nagesa ku'mo hige'na amatale'na atiyegahe Masetonia umainoe.

Anumaya Koti tokiyaleti agai ali'yama ne'aliya vaya'mo'ya Satanina agase-mainae.

¹⁴ Kalaisi'a Satani ayapitila tavalegeta agai'ene ailokaeta mainonanagita muki'a kefo yana agaseto mainona yafe Anumaya Kotife muse huta agia alisaga hisune. Agaya tagaila laya higeta alule alule vaiyeta Yisasi kema nehuna yafena ani kemona havilama hageno kanale mana'age yamo hia kava huno ute ete nehie. ¹⁵ Higeta lagaya Yisasi kema nehuna vea'mogata Kalaisi'ene ailokaeta mainonafe kanale mana'age yamo hia avamete hunageno Anumaya Koti'a muse nehie. Ani mana'amo'a ute ete huno muki'a veapi vige'ya ani mana'age kea nehavigeno amaku amamema alinegatia vea'nene kefo yake'ya hu'ya hani yapima tegelege nehia atafi visaya vea'nene ani kea nehaviye. ¹⁶ Nehavigi nago'amo'ya ani kea havi'ya “Akave omalegahune.” hu'ya nehaya veala hani yapi tegelege nehia atafi visaya vea'mogamife mani kemo'a fali-mai vea'mogami mana'amimo

hia kava humaineanagi nago'amo'ya havi'ya amakupi malet'e'ya “Maige maige hisuna yafe kanale mana'age nehie.” hu'ya nehae. Tusi'a ali'ya ne'alunanagi tagaitigela mani ali'yana o'alute'asine. ¹⁷ Kasago'ya vea'mo'ya Anumaya Koti ali'yateti “Miya alisune.” hu'ya nehagi tagaila Anumaya Koti'a hulategeta fatago huta kelamagama huhaleta hunana Kalaisi'ene ailokaeta maineta Anumaya Koti aufina mani kea huhaleta nehune.

3

Aposolo vayala haegafa alino hagelafi-latenea kemo ali'ya vava mainae.

¹ Tagaya nago'ene tagaiti laugafa alita haisuna yafe mani kea nehuno? A'ao na'a nohune. Tagaifema ohaviya yafe mani kea nehuno? Nago kanomofe avopina “Kanale kano mainegi agai kea haviho.” hu'ya kae-malenaya kea ali'ya vaiyatete nehagi tagaifena ago havimainaya yafe tagaya ani avamete avona alita vai no'ayone. Tamatale'na visuana “Ani avamete avona namiho.” hu'na ohugahue. ² Ohugahugi tamakaya tagai kea havitetama tamaku'a ago aiyahae hage'ya muki'a vea'mo'ya nelamake'ya tagaifena “Anumaya Koti kea fatago ke nehae.” hu'ya nehagetama tagai avo kana hutama mainageno tagupina hane. ³ Nagaya tamaya hu'na Kalaisifena tamahapaugeno Kalaisi'a ani avona tamakaife huno vea'mogami amakupina kae-malene. Oko titetila yafamona amega okaenegi haimu'a hanea Anumaya Koti'a

agai'a Avamuteti vea'mogatami amakupina ani avona kae-malegetama Kalaisi avo kana hutama mainayafe muki'a vea'mo'ya hapali'ya nehaviye.

⁴ Kalaisi'a tayama hia yafe Anumaya Kotifena tametiti nehuta mani kea nehune. ⁵ Nehunanagi “Mani ali'yana tagaitige alimainone” huta nohunagi Anumaya Koti'a tokiya lamigeta mani ali'yana ne'alune. ⁶ Anumaya Koti'a kosa helatesia tokiya'a tamineafe Anumaya Koti'a haegafama alino hagelafi-latenea kema hamapaisuna yafe hulatene. Anumaya Koti'a hagoteno kahegi kea yafate kae-malenege'ya vea'mo'ya akave malesaya amakesa haviyanagi tokiya'amia omalege'ya ago alitagae-mainaya yafe fali-mainae. Fali-mainagi Avamu'mo'a anima haegafama alino hagelafi-latenea kea tave-liteno haegafa yama alita maige maige hisuna tahaimula nelamie.

⁷ Nelamianagi hagote kahegi kema akave omalaya yafe ani kemo'a hamaege'ya fali-maine. Ani kahegi kea yafate kaeteno amaminea yupa Anumaya Kotitegati tokiya hale yamo'a falote huno Mosese augosafina tusiya huno aihalea yamo Isaleli vea'mogami amaulaga ayeno haviya hige'ya Mosesena o'agageno ani tokiya'age hale yamo'a osi'a maigeno fanane humaine. ⁸ Meni kanafina Alu Aotage Avamu'mo'ma taya nehia ali'yamo'a nayo kahegi kemono agaseno tusiya huno tokiya'age hale yamo'a falote humaine. ⁹ Hagote kahegi kema akave omalageno hefalimatenea kea tusi'a tokiya'age hale yama'aene kema hanesiana Anumaya Koti aufina fatago huta maisuna kea hagote kemo hale yamona

ago agaseno tusi'a tokiya hale yama'aene kea hane. ¹⁰ Tamage tusi'a tokiya hale yama'ama hanea kema falote humaineafe hagoteno falote humainea hale yamona agase-maineanagino menia hagote kahegi kemo'a aye hale olatene. ¹¹ Fananema humainea kahegi kemo'a tokiya hale yama'aene hagoteno falote humaineanagi menima agola maige maige hisuna kemo'a tusi'a tokiya hale yama'a hanea ke hane.

¹² Ani kemo'a “Agola hanege hanege hugahie.” huta tametitima nehuna yafe kolia huta fala okita ani kege'ya huhaleta nehune. ¹³ Nehuta fala'nokunagi Mosesena augosafima tokiya hale yama fanane hisige'ya Isaleli vea'mo'ya o'agesayafene huno augosafina kenaletila alino fala kige'ya o'agenae. O'agenayanagi tagaya Mosese'ma humainea avamete huta Anumayamo kea fala nokune. ¹⁴ Fala nokunagi Mosese'a kenaleti augosafina alino aiso humalenea avamete huno Anumaya Koti'a Isaleli vea'mogami amaku'amona alino ha'yagino atalako hige'ya havilama ohunae. Nagi nayo'ene meniene Anumaya Koti avopima hapaliyana kenaleti aiso humalenea avamete huno amaku amamemo'a aiso humainege'ya havilama nohagi nago'a vea'mo'ya Kalaisi'ene ailokaesayana ani amaku amamema ali'ya aiso humalenaya yana Kalaisi'a alitalege'ya havilama hu'ya nehaviye. ¹⁵ Tamage menienema Mosese kahegi kema hapali'yama haviyana amaku amamemo'a kenama Mosese'a alino augosafi aiso humainea avamete hige'ya havilama nohae. ¹⁶ Havilama nohagi nago'a vea'mo'ya amaku'a aiyahae

hu'ya Anumayamotega visayana ali'yama aiso humalenaya yana Kalaisi'a alitalenage'ya havilama hugahae. ¹⁷ Nagi Anumayamo'a Alu Aotage Avamu maine. Anumayamo Avamula tagai'enema mainesiana tagu'ama alino aiso hulateno aigagilatenea yana aligalu helateneafe nago'ene kahegi kemo akavela omalegeta nofipi mainaya vaya kana huta nago'ene omainone. ¹⁸ Taugosafi aiso humainea yana omalegeno Anumayamo tokiya hale yamo'a lagai taugosafi aye halege'ya vea'mo'ya nelage'ya Anumayamo tokiya hale yama'a ne'agae. Avamu'mo'a agai avamete vea'ne maisunafe tagaila alino hapae-lategeta agai'a tokiya hale yana alime alime nehaune.

4

Aposolo anagala mopa susufane kana humainae.

¹ Anumaya Koti'a kalagi ailateno “Nagai kea huhaletama hiho.” huno hulateneafe “Kasalotahae.” huta nohune. ² A'ao ani ali'yama alunana falakita tagaye hisifa kavala huta veala aye-mavataga huta Anumaya Koti kea alita aiyahae huta “Mage nehie.” huta havigea nohunagi hulama huta huhaleta nehune. Anumaya Koti aufina vea'mogamina kelamagea hamapaunage'ya muki'a vea'mo'ya amaku'aleti “Lamage nehae.” hu'ya nehae. ³ Nehagi Yisasifena kanale mono kema huhaleta nehunage'ya nago'a vea'mo'ya havilamama nohayana ani vea'mo'ya hani yapima tegelege nehia atafi visaya vea'ne mainae. ⁴ Satani'a*;

ma mopafi kava yagai-mainea kanomo'a, Yisasi kema nohaviya veala Kalaisi'a kefo ya'amia alino kanale humateno alino halematesia kea ohavisaya yafe Satani'a amaku amakesa alino aye-lileno amaulaga alino asu humainea vea kana humatene. Humategeno Kalaisi'a agai'a tokiya hale yama'a hanea kano maineanagino Anumaya Koti'enena nago avamete hu'ana maina'e. ⁵ Maina'ageta lagaya tagaiti laugafa alita haisuna yafe mani kea huhaleta nohunagi Yisasina Anumaya Koti'a taugafa aligatigahe hutenea kanoa "Anumayati maine." huta tamaya hisunafe Yisasi ali'ya vaya mainone. ⁶ Anumaya Koti'a ika'ene mopaene talo humaleteno "Hani yapitila halo." huno'ma humainea kanomo'a hani yama hanea tagu'afina aye hale-lategeta maineta Yisasi Kalaisi augosafina Anumaya Koti tokiya hale yamo'a hanegeni tave-ligeta age-mainone.

⁷ Age-mainonanagi Anumaya Koti'a agai'age ani ala tokiyamona aepa'a maineafe "Vea'mogamina amave-lisue." huno ani lokiya yama'a tagaila, fulu fulu vea'mogati tagupina malenegeta agai ali'yana ne'alunage'ya vea'mo'ya nelage'ya "Amakaila tokiya'amia omalene." hu'ya Anumayamo agia alisaga nehae. ⁸ Muki'a kanafina alu kana ya alu kana yana tagaitela falote nehigeno'agi tagaila alino haviyatafana nohie. Tagesa ku'mo nehianagi tagesa alino haviyatafana nohie. ⁹ Yisasi kema huna yateti ali haviya hulatananagi Anumayamo'a otatalene. Muki'a kanafina ka'yo kevema lamiyana ofalinone. ¹⁰ Nagi Yisasi'a

fali-mainefiti hetimainea haimu'mo'a tagai taugafale hanenage'ya agesayafe “Yisasina haesunageno falisie.” hu'ya hutenaya kavala menia ani'a hu'ya tahae'ya faligahe nehae. ¹¹ Yisasi'a fanane hisia taugafale maineno tokiya'ama nelamia yana amave-lisiafe tagaya ma mopafima mainona kanafina Yisasi kea huhaleta nehunage'ya hamaiya vai-late'ya tahaegahena mai'ya nehae. ¹² Hige'ya Anumaya Koti kema huhaleta huna yafe fali yamo'a tagaipina haneanagi agola maige maige hisuna haimu'mo'a tamakaipina ali'yana ne'aliye.

¹³ Anumaya Koti avopina mage huno kae-maleneane

“Tamage nehie hu'na havi'na nagupi male'na nametiti hu-mainoafe mani kea huhale'na nehue.” huno hige'ya kae-malenayane.

Tagaya ani'a huta “Anumayamo'a lamage nehie.” huta tagupi malenonafe mani kea huhaleta nehune. ¹⁴ Tagaya ago havimainone Yisasi'ene ailokaeta mainonafe Anumaya Koti'a Anumayatimo'a Yisasina fali-mainefiti alino hetitenea kanomo'a tagai'ene tamakai'enena ani'a huno fali-mainesupitila ali hetilateno agai'a mainel-ega tavaleno lategahie huta tagesa havimainone.

¹⁵ Tamakai tamaya hisunafe tagaitela kana yana falote nehianagi kasago'ya vea'nele Anumayamo kayone yama'amo'a falote hige'ya ne'agageno Anumayamo'a kasago'ya veala amaya nehi-anagi'a kasago'ya vea'mo'ya Anumaya Kotifena muse hu'ya agia alisaga hugahae.

Aposolo anaga'mo'ya amametitima haya yateti

tokiya ali-mainae.

¹⁶ Nagi amega taugafamo'a haviya hugahe hi-anagi muki'a kanafina Anumayamo'a taipamona alino haegafa hulategeta Anumayamo ali'yafena “Kasalo tahae.” huta no'atalone. ¹⁷ Tamage menima falote nehia kana yana afa ya kana huno fanane hugahie. Ani kana yama ne'aluna yafe ikapinaga haita maisuna yamo'a, tusi'a ala yane, ohavunama'a kanale tokiya hale yana falote huno hanege hanege hugahie. ¹⁸ Ikapinaga haita maineta alisuna yafena ago havimainonafe ma mopafi yafena tagesa havi havi nohunagi o'agenona yana, haenagama falote hisia kanale yafe tagesa nehavune. Ma mopafi hanegeta ne'agona yana fanane hugahigi no'agona yana, haenagama falote hisia kanale yana afa'a agola hanege hanege huno hanegahie huta nehune.

5

¹ Tagaya ma'a huta nehavune ma mopafi mainona taugafa yugu no kana hu-mainegi falisunageno'a ani nona fanane hisigeno Anumaya Koti'a ikapinaga agola hanege hanege hisia no kana taugafa talo tala hulatene. Vaya'mo'ya ani nona amayatetila okinagi Anumaya Koti'a agai'a kimalene huta ago havimainone. ² Havimainonanagi menia ma mopafi taugafale mainonafe “Kasalo tahae.” huta ikapinaga maisuna taugafa tamisia yafe tusiya huno nelahaiye. ³ Nelahaiyanagi ani laugafa aliteta hakalo kana huta omaigahunagi taugafaene vea'ne maigahune. ⁴ Maigahunagi ma mopafi mainona taugafalela kana yamo

higeta “Avovo.” huta kalagila ne'aita falisuna yafena notahaiyanagi maige maige hisuna taugafa alisuna yafena aluya huno nelahaiye. Maige maige hisuna tahaimu'mo'a esia'amo haegafa kenama nefaiya avamete huno falino fananema hisia taugafa alino aiso hulatesigeta agola maige maige hisuna yafena aluya huno nelahaiye. ⁵ Anumaya Koti'a tagaya agola maige maige hisunafene huno talo hu lateneanagita ani yafena “Tamage nehie.” huta havisuna yafe Alu Aotage Avamula lamine.

⁶ Tamineafe tagu'amo'a kolia nohianagita havilama huta havilinone ma mopafi mainona kanafina ikapinaga Anumayamo avatela omainonane. ⁷⁻⁸ Omainonanagi Anumayamona o'agenona kanafina agaife havita lagupi maleta lametiti hu-mainona yateti ma mopafina vaine'ayeta ma ma mainona taugafa ne'ataleta Anumayamo avatela agola umaisuna yafena aluya huno nelahaiye. ⁹ “Ma mopafi mainonano falisunano Anumayamona haisia kavala hugahune.” huta huna yafena aluya huno nelahaiye. ¹⁰ Tagaya muki'a veala nagoke nagoke'mogata Kalaisi aule mo hetisunageno mopale'ma havi au'ava yama humainesuna yafe'ene kanale au'ava yama hu-mainesuna yafe'enena agelama huno fako hulateno tagayama maita nehisuna avamete anonatia tahaote tahaote tamisiafene huta Anumayamona haiya kavala nehune.

Tagaya vea'ma alita Anumaya Koti'ene nago amaipa humatesuna ali'yatia hane.

¹¹ Tagaya Anumayamofena “Koli'a hisuna kano maine.” huta havilineta vea'mo'ya fatago hu'ya maisaya au'ava yana amave-nelune. Anumaya Koti'a lagupina nelageno “Kanale kava nehae.” huno nehio? Ifi tamakaya tamaku'afinaga tagaifena “Kanale kava nehae.” hutama nehao? hu'na nehue. ¹² Mani kea tagaiti lagi alita ala hisuna yafe nohunagi nago'a vea'mo'ya amega amaugafahe havi'ya muse nehu'ya “Fatago kavake'ya nehuna vea'ne mainone.” hu'ya nehayanagi amakupina o'agene'ya ani vea'mo'ya tagaifema tamahavi-gesagetama tagaifena “Kanale kava nehae.” hutama muse nehutama kenona'amia hamapaisayafene huta mani kea nehune. ¹³ Anumaya Koti ali'ya ne'alunage'ya nago'a vea'mo'ya tagaifena “Aifo vava mainae.” hu'ya nehayanagi ani aifonafo kava'ma hisunana Anumayamo agi alisaga hisuna yafe ani kavala nehune. Tamakai tamaya hisunafene huta kanale tagu tagesa nehavita Anumaya Koti ali'yana ne'alune. ¹⁴ Kalaisi'a lagaifena hau ayamopafima nehaiya yamofe huta agai ali'yana ne'alune. Ne'alita nago yafema havunana nago kanomo'a muki'a veafene huno fali-maine. Kalaisi'a tagaife huno fali-maineafe muki'a veala agai'ene tokaeta ago fali-mainone. ¹⁵ Faliteta ago eteta hetita haegafa vea'ne mainonafe tagaiti tahaisia kavala ohisunagi tagaifema huno faliteno heti-mainea kanomona tagu'a amiteta agai'ma haisia kavake'ya hisunafene huno Yisasi'a fali-maine.

¹⁶ Nayona vea'mo'ya nehaya kavafena ageteta amegati fako humainonagi menia Kalaisi'a

tagaifema huno fali-mainea kema havuna yafe ani kea nago kanomofena nohune. Nayona Kalaisi'ma humainea kavala ageteta fako humainonagi menia ago havilama huteta ani kavala nohune. ¹⁷ Ani yafe nago'a vea'mo'ya Kalaisi'ene ailokae'ya maiya'amo haegafa veala hapa'e'ya mainageno atafa au'ava amaipamo'a fanane higeno haegafa amaipa alino hapaematene. ¹⁸ Anumaya Koti'a agai'a ani yamona aepa'a maineanagino agai'enena kame vaya'a mainonageno Kalaisina hutegenoa ea'amo Anumaya Koti'ene melino taipa falu hulategeta agai'ene nago taipale mainone. Mainonageno Anumaya Koti'a "Nago'a vea'mogamina ani kavala humategahue." huno humaineafe tagaya amaipa alita agai'ene falu humatesuna ali'yama'a tagaila lamine. ¹⁹ Nelamino "Veala nagai'ene alitama amaipa falu hisia kea mage hutama hamapaiho." huno mage humaine "Kalaisi'a tamakaifene huno fali-mainea yafe Anumaya Koti'a kefo yatimo anona'a otamisia agesa haviteno ma mopafi vea'mogami amaipa alino falu humateno agai'ene nagopi maiho." huno hulatene.

²⁰ Hulategeta Anumaya Koti'a Kalaisi agile huhaleno tahapaigeta agai'avayafiti kea mage nehune "Musetami nehunagi Kalaisi'a tamakaifene huno fali-mainea Anumaya Kotina tamako'ya hute yana ataletama agai'ene tamaipa alitama falu hutama nagopi maiho." huta tamahapai-mainone. ²¹ Nagi tagaila taya hisiafene huno hulateneafe nagola osi kefo yama'a omalenea kanoa, Yisasi'e, tagayama kefo yama humainona

yana alino Yisasi agupile maleno kefo yatimo anona'a amigeno kefo yama nehaya vaya kana huno fali-mainaeafe Anumaya Koti'a tagaifena “Nagai'ni'a fatago vea'ni'a mainae.” huno hulatene.

6

Aposolo vaya'mo'ya ali'ya'amiletila kasago'ya kana ya ali-mainae.

¹ Anumayamo'ene ailokaeta ali'yana ne'alita mage huta ali lamakafa nehune. Anumaya Koti'a kayone yama'a ago tamamigetama ali-mainagi afa kavala ohutama akave maleme maleme haiho. ² Anumayamo'a agai'a avopina mage huno hu-maineanae

“Nagu'amo'a kanale nehige'na nahavigaya kea havuanagi tamaugafama aligatisua kanale tamaya hugahue.” huno hu-maineanae.

Hu-maineanagi'na tamahanepauve meni kanafina Anumaya Koti'a agu'amo'a kanale nehigeno tamaku tamamena aligatisiafe nehaigi tamaku'a aiyahae hiho.

³ Ali'yatihena “Haviya hie.” hu'ya ohisaya yafe tagaya kefo yana nohune. Havigu kefo yama hisunana vea'mo'ya nelage'ya amaku'a aiyahae ohugahae huta lagaya tagu tametela kava ne'yagaune. ⁴ Anumaya Koti ali'ya vaya mainone huta muki'a ma'a kavala nehune. Vayamo'ya ali'ya haviyama hulatayana tokiya vaita mailava huta mainone. Kana yama falote higeta mailava huta mainonafe tamakaya “Kanale ali'ya vaya'a mainae.” hutama hisaya yafe tagutela kava ne'yagaune. ⁵ Ne'yagaunageno

ma'a yana falote humane ka'yoteti nelahae'ya nofi hulatenae. Muki'a vea'mo'ya alakenake hu'ya tahaegahe humainae. Tusi'a ali'ya ne'alita taula ofaonageno tusi'a tagate-mainae. ⁶ Na'a hulatayanagi oni'ya'age kavala ohune. Anumayamo kea havilama hulineta mailava huta maineta veala ali kayone humateta amaya nehune. Alu Aotage Avamula tagu'afi maineno laya higeta lamage huta veafena tahau tayamopafi nelahaiye. ⁷ Nelahaigeta kelamage kea huta Anumaya Koti tokiyaleti ali'yana ne'alita vaya'mo'ya ati kevema tamaga amayapina ne'ali'ya hauga amayapina halegula aye haite'ya kamema nehaya avamete huta fatago kavake'ya nehuta Satani'enena tua nehuta Anumayamo ali'yana ne'alune ⁸ Nago'a vea'mo'ya tagia alisaga nehayanagi nago'a vea'mo'ya tagia ali haviya hunelatae. Nago'a vea'mo'ya kamugea hatage'ya vainelayanagi nago'a vea'mo'ya hu'ya kanale hunelatae. Tagaya tama kavake'ya nehunanagi tagaifena "Havige hu'ya ayelavataga nehae." hu'ya nehae. ⁹ Nago'a vea'mo'ya tagaifena "Afa vaya kana humainae." hu'ya nehayanagi Anumaya Koti'ene nago'a vea'nene "A'ao amaki hanea vaya mainae." hu'ya nehage'ya nago'a vea'mo'ya tatafa hu'ya tahayayanagi ageho ofalinone. Anumaya Koti kema nehunafenagi'ya hamai vailate'ya tahayayanagi ofalinone. ¹⁰ Nago'a yafena tahauna hunanagi muki'a kanafina taipamo'a kanale nehigeta musena nehune. Afeno yatia omaleanagi Yisasi kema huhaleta

nehunafenagita nago'a vea'mogamina tusi'a kanale yana ne'amamune. Nago'a yatia omaleanagi afeno ya'amima hanea veya kana huta mainone. Ani yamo'a tagaipina falote hige'ya vea'mo'ya tagaila nelagae.

¹¹ Kolini kumate mainaya nelafugatama tamakaifena aluya huno nelahaigeta nago kea fala okinonagi fatago huta tamahapai-mainone. ¹² Tamahanepaunageno tamakaifena lahaiyanagi tamakaya tagaifena otamahaiye. ¹³ Nagai'ni nafa'ne kana hutama mainayafe tamakaila tagu'ama tamamuna avamete hutama anonatia tagaila tamaku'a tamiho.

Tagaya Anumaya Kotina alu aotage noma'a mainone.

¹⁴ Ali'ya aligaheno a'nemo'ya vema aligaheno vemo'ya a'nema aligaheno na'ama hinutamahena Anumaya Kotina amakave'no hune'ataya vea'nenena ailo okaeho. Ailokaetama maisayana hana'a huno fatago humainea ya'ene kefo yamo'enena ailokae'ana maiga'e? Hani yamo'a hale yamo'enena ailokaega'o? ¹⁵ Ifi Yisasi Kalaisi'ene Satani'enena ailokae'ana nagoke anaipale maiga'o? Ifi Anumayamo akave nomalaya vea'nene Yisasife havi'ya amakupi malenaya vea'nene ailokae'ya maisayana nagoke amaku amakesale omaigahae. ¹⁶ Ago fali-mainaya veafe "Anumayati maine." hu'ya amakisana ne'vaiya ya'ene Anumaya Koti'ma mainea no'ene ali'ya nagopi malesayana kanale hugahio? Anumaya Koti'a haimu'ene

kanoa tagai tagupi maineafe Anumaya Koti avopina mage huno hu-maineane

“Nagaya amakupi maine'na amakai'ene vaiyatete nehu'na Anumaya Koti'ami maisuge'ya nagai anaga maigahae. ¹⁷ Ani yafe kefo yana ne'ataletama alule mainetama oni'ya'age kefo yana ohisage'na nagai'nilega tamavale'na tamategahue. ¹⁸ Lamatene'na tamakaila nelamafa'na maisugetama nagai nafa'ne muna'neyaga maigahae. Nagaya muki'a tokiyamona aepa'agi'na mainoe. Anumayamo'na, mani kea nehue.” huno hige'ya kae-malenayane.

7

¹ Ani kema hulokiya vaino hulateneafe nahau nayamopafi nenahaiya nenafu-gatama taugafaene tagu tame'ene ali haviya hisia kavala ne'ataleteta Anumaya Kotifema koli hisuna tagesa havita fatago kavake'ya huge huge nehuta alu aotage vea'ne maisune.

Kolini vea'mo'ya amaku'a aiyahae haya yafe Polo'a muse humaine.

² Tagaifena tamaipa haviya ohutama tamaku'a lamiho. Nago'a veala ali haviya hu no'amatone. Nago'a veala havi katela amavaleta no'amatone. Nago'a veala ayemavataga huta mone'amia no'alune. ³ No'alunagi kelamama-kisuafene hu'na mani kea nohugi “Nahau nayamopafi nenahaiye.” hu'na ago tamahapai-mainoe. Afa'a maisunano falisunano tamakai'ene ailokaeta maigahune. ⁴ Tamakaya fatago

hutama maigahae hu'na nametitia nehu'na tamakia alisaga nehue. Muki'a kana yana nagaipima falote hige'na ani yapima mauvanagi tamakaifena naipa havi'na tusi'a muse nehue.

⁵ Masetonia kotega uva'yi hunanagi alu kumate kumatela kana yamo'a falote hige'ya nago'a vea'mo'ya tagai'ene ke vai'ya tu hulatageno tagu'amo'a koli hia kava higeta maifalua ohunone. ⁶ Ohunonagi Anumaya Koti'a kana yama aliya veala amaku'a alino kanale hune'amatea kano maineanagino Taitasina hutegenoa ea'amo tagu'a melino falu hulatene. ⁷ Taitasi'ma ea yafekela musena nohunagi Taitasina hutageno mage huno me lahapaiye “Amakaya Kolini kumate mainaya vea'mo'ya kanale yama hunataya yafena nagu'a alino kanale humaine.” huno huteno “Kagesaya yafena hamaige'ya kagayama hamapai-mainana kefo ya'amihena amaku'a aiyahae hayanagi ne'atale'ya ‘Nago'a vaya'mo'ya kagai kagia ali haviya hugahe hayanagita tagaya kaya hugahune.’ hu'ya hae.” huno hia yafena naipamo'a kanale hige'na tusi'a muse nehue.

⁸ Nehugi avoma kae'na lamamuana tamaipamo'a haviya hie hu'na nagesa havuanagi “Haviya hu'na avona kae'na amaminoe.” hu'na hu-mainoanagi menia osi kanafina tamaipamo'a kana higetama etetama tamaku'a aiyahae haya yafena muse nehu'na “Kanale'ya hu'na avona kae'na amaminoe.” hu'na nagesa havimainoe. ⁹ Havite'na menia muse nehue. Tamaipa kanama haya yafena musena nohugi tamaipa kana hutetama etetama tamaipama aiyahae haya

yafena muse nehue. Anumaya Koti'a ani'a huno tamaipa kana hutetama etetama lamaipama aiyahae hutama agaitegama aya yafena muse nehigi tamaminoa avomo'a tamakaila alino haviyana ohunegi kanale'ya hulamatene hu'na nehue. ¹⁰ Tagu'a aiyahae hisunafe Anumaya Koti'a kana yana tagu'afina nelamie. Tamisigeta aliteta tagu'a aiyahae hisunageno tagu tamena aligatisiafene huno nelamie. Ani yafe Anumaya Koti'ma tamia kana yafena “Otahaiye.” huta nohunagi ma mopafi yafema amakesa havi havi nehaya vea'mo'ya kana yama falote hinage'ya amaku'ama aiyahae ohisageno'a Anumaya Koti'a amaya ohinage'ya falite'ya hani yapi ugahae. ¹¹ Tamakaipima mainea kanomo'a kefo yama hige'na osi avona kae'na tamamugetama agetageno tamaipamo'a kana higeno Anumaya Koti'ma tamaminea kana yana tusi'a kanale'ya hulamatene haviho. Ani kefo yafena “Tagaye nehinagetama aupa'a alitalegahune.” hutama tamaku'a aiyahae humainagi koli hutama ani kefo yama humainea kanomofena tamaipamo'a kana higetama anona'a aminayafe nagai'ma nagesaya yafena nelamahaiye. Anima muki'a yama humainaya yafena tamakaya ani kefo yama ohunaya yana ago naveli-mainae.

¹² Mani avoma kaovana ani kefo yama nehia kanomofe'ene kefo yama hutaya vea'nene hu'na okaenogi tamakaife hu'na kae-malogetama tamakaya hapalitama Anumaya Koti aufina ani avopiti kea akave maletama “Polofe lahaigeta agai vea'ne mainone.” hutama

hisayafene hu'na mani avona kae'na tamaminoe.
¹³ Tamaminogi nagai kema haviya yafena naipamo'a kanale'ya nehie.

Na'afenomagi ani'a hutama Taitasi aipama alitama kanale haya yafena nago'ene naipamo'a kanale'ya nehie. ¹⁴ Tamakaifena muse hu'na tamakima alisaga hu'na Taitasina hapaugetama kanale kava'ma hutaya yafena nagayea nohie. Tamakaila kelamagema tamahapai-mainoa avamete hu'na Taitasina tamakaifema hapauva kea havigea hu'na ha'opainogi tamakaya hapauva avamete hutama kanale'ya humainae. ¹⁵ Tamakaya koli hutama atali hutetama agai kema haviya yafena Taitasi'a agesa havi havi huno tamakaifena aipamo'a aluya huno musena humaine. ¹⁶ Ani yafe tamakaya kefo yana ohiho. Fatago hutama maigahae hu'na nametititia nehu'na tusi'a muse nehue.

8

Anumayamona amaku'a aminaya vea'mo'ya Yutia vea'ne amaya hisaya mone alitalu humainae.

¹ Anumaya Koti'a Masetonia maine'ya Yisasina amaku'a aminaya vea'mogamina kayone yama'a amamige'ya kanale yama haya yafe tamahapaigae hue. ² Ani veapina tusi'a kana yamo falote hianagi Anumayamofena muse nehu'ya amakaipina osi kano'a afeno ya'amia hanege'ya afa vea'ne maiyanagi tusiya hu'ya alu vea'mogamima amaya hisaya yafena monea alitalu hu'ya kanale kavake'ya humatenae. ³⁻⁴ Tamahanepauve osi kano'a

afeno ya'amia hanege'ya “Nago'a tagaitia malesune.” hu'ya amakesa ohavi'ya havigu mainaya vea'mogamina monea amaminae. “Ani kava hiho.” huta hama'opaunanagi “Tatalageta Yutia maine'ya Yisasina amaku'a aminaya vea'mogamina amaya hamano.” hu'ya hute'ya ani kavala huminae. ⁵ Hayanagita “Monea osi'a amamigahae.” huta hunanagi ala mone hage'ya amaminae. Ani yama'agelomagi Anumaya Kotifena hamaiya avamete hu'ya hagote'ya amakai'ami amaku'a Anumayamona amitafa hute'ya ani'a hu'ya amaku'a tagaila taminae. ⁶ Na'a hayafe Taitasifena mage huta hapai-mainone “Hagoteka Kolini vea'nene umaineka ‘Nago'a vea'mogami amaya hisia monea alitalu hiho.’ huka hamapai-mainanagi menia anima kayone hisaya ali'yana molivayayo.” huta hapai-mainone. ⁷ Tamakaya muki'a yama haya yamo'a aluya huno kanale ya higetama Anumayamofena havitama lamakupi maletama lamametitima haya yamo tokiya'agela hutama Yisasi kema hayana fatago kege'ya nehae. Kanale tamaku tamakesaene vea'ne mainayafe tagaifena tamahau tamayamopafi nelama-hainagetama menia kayone hutama vea'mogamina amaya hisaya monema ne'amamiya ali'yana aluya hutama aliho.

⁸ “Monea amamiho.” hu'na kahegi kea nohugi nago'a vea'mo'ya kanale'ya hu'ya monea malage'na agete'na fako hulamatogi hana'a hugahae? Nago'a veafe tamahau tamayamopafi nelahamaiya yana kanale'ya huno haneo? hu'na nelamakoe. ⁹ Tamakaya Anumayati

Yisasi Kalaisi'a kayonema hulatenea yafena ago havilinae. Tusi'a kanale yapi maineanagino tagaifene huno tagayama kanale noma maisunafene huno agai'a kanale mai'yama'a ataleteno ma mopafi ea'amo tusi'a havi noma mainea yateti tamakaya muki'a kanale yana ali-mainae.

¹⁰ Ali-mainagi ani kanale kavala hiho hu'na nagesa havua kea tamahapaigahugi haviho. Tamakaya ago ha'no humainea kafufina hagotetama “Ani monea alitalu hisune.” hutetama aepa hetama alitalu hu-mainagi menia ani ali'yake'ya alitama alivayayeho.

¹¹ “Monea amamigahune.” hutama hayanagi menia ani'a hutama amamisaya tamakesama havinutamahena malenesaya yapitila ali ha'no hutama alitalu hutetama amamiho.

¹² Nagi amaku'amo'a kanale hige'ya malenaya monefiti amaminaya yafena Anumayamo'a muse humateanagi nago'a vea'moya nago ya'amima omalesayana Anumayamo'a “Amamiho” huno ohugahie.

¹³⁻¹⁴ “Amakaya kanale no maisaya yafe ala monea amamitetama monetamia omaleafe tamakaya havi no maigahae.” hu'na nohugi menia monea tamakaipi haneafenagi'ya omalege'yama afa'a mainaya vea'mogamina amaya nehutama haenaga'a tamakaya omalesigetama afa'a maisage'yahena tamaya hugahae. Ani kava'ma hisayana muki'amogatama nago avamete hutama maigahae. ¹⁵ Nayona Anumaya Koti'a Isaleli vea'mogamina ikapinagati kave amaminea

kanafina Anumaya Koti avopina mage huno hu-mainean

“Kasago'ya ali-mainea kanomo'ene osi'a ali-mainea kanomo'enena amamu hia kave nemainae.” huno avona kae-maleneane. Na'a humaineafe amaya hiho hu'na nehue.

Polo'a nago'a vayala humatege'ya Kolini kumate umainae.

¹⁶ Tamaya hisua nagesa havua nagesa Anumaya Koti'a Taitasina ago aminea yafena Anumayamofena muse nehue. ¹⁷ Muse nehugi “Kolini kumate vuo.” huta hutonana “E, muse nehue ani kumate visua nagesa nehavue.” huno agai'a humaine. ¹⁸ Humainegi nago kanoa kanale'ya huno Yisasi kanale mono kea huhaleno hige'ya muki'a vea'mo'ya muse humainaya kanoa hutesuge'ana Taitasi'ene uga'e. ¹⁹ Ani yama'agelomagi alu kumate kumate Yisasina amaku'a aminaya veapina tagai'ene vaiyeno taminaya monea alita momisunafe ani kanomona ali'ya hetitenae. Hetitageta veafeke tahau higeta Anumayamo agima alisaga hisuna yafe “Monea alita momamisune.” huta nehune.

²⁰ Ani tusi'a monema alitalu haya monehena havigu vea'mo'ya tagaifena “Havi kava hae.” hu'ya hisaya yafenagita lagaya kava yagaita ani tafutagana'ene nagopi vaiyegahune. ²¹ Kava yagaita Anumayamo aule'ene vea'mogami amaule'ene kanale'ya huta ali'yana alisuna yafe nelahaiye.

²² Nelahaigeta nago tafu-tagana'a muki'a kanafina alu ali'ya alu ali'yana ne'alianagita fako huta agonana tokiya'age huno vea'mogamina

amaya nehianagino menia aluya huno lamakaifena “Kanale kava hugahae.” huno hia yafe Taitasiganiene hunategahune. ²³ Tamakai'ma tamaya hisia yafe Taitasi'a nagai'ene tokaeno maineno ali'yana ne'alige'ya alu kumate kumate mono note vea'mo'ya humatage'ana agai'ene va'a tafu-taganaganiania ali'yama ne'ali'a yamo'a Kalaisi agia alisaga neha'e. ²⁴ Na'a neha'afe tamakaya tamahau tamayamopafima nelahamaiya yafena tamakia alisaga huta hamapai-mainona yana amavelisaya yafe anima esaya vayala amaya nehisage'ya Yisasina amaku'a aminaya vea'mo'yama agesayana “Polo'a humainea kea tamage humaine.” hu'ya hugahae.

9

Kolini vea'mo'ya muse yana Anumaya Koti vea'nea amamisaya yafe humaine.

¹⁻² “Yutia maine'ya Yisasina amaku'a aminaya vea'ne amaya huta monea amamigahune.” hutama haya kea havite'na Masetonia kotega mainaya vea'mogamina tamakaifena mage hu'na hamapauve “Akaiya kotega mainaya vea'mo'ya ago ha'no hia kafufina anima amamisaya monea ago talo tala humalena.” hu'na hamapauge'ya nago'a vea'mo'ya tamakaya tokiya'age'ma hutama haya yafena havite'ya “Tagaya ani'a hugahune.” hu'ya nehae. Ani monema amamisayafene hu'na nago'ene avoma kaesuana afa ya kana hugahie. ³ Tamakaifena “Ago talo tala humalena.”

hu'na hamanepaugi havigu “Kagaya havige nehane.” hu'ya huyafenagi ani monea menima alitalu hisaya yafe nago'a tafu-taganagamina humatesuge'ya tamakaitega ugahae. ⁴ Ani monema alisuafe nagaya amakave visua'amo'na Masetonia kotega mainaya vea'nenema visuge'ya havigu monema alitalu ohunesage'na nagayaene tamakayaenena tagaye huyafene hu'na nago'a vayala hagote'na humatesuge'ya ugahae. ⁵ Ani monehena “Kasago'ya amamigahune.” hutama humainaya monea talo tala hisayafene hu'na nago'a tafu-taganagamina humatoge'ya ugahe nehagi uva'yima hute'ya “Na'ama tamiho.” hu'ya hisagetama amamiho. O'amamisaya tamakesa ohavitama tamaipa kanale yapiti ala monea afa'a amamiho hu'na nehue.

⁶ Ani monema amamisaya yafena tamakesa haviho. Osi avina kano'a fai-malenesia kanomo'a kosa ohesia kave kano'a aligahigi kasago'ya hoya vai-malenesia kanomo'a kasago'ya kave'a aligahie. ⁷ Na'a hu-maineafe tamakaya tamahaote tamahaote tamaku tamakesa havitetama “Ma monea amamigahune.” higeno tamaipamo'a kana'agela ohinagetama kanale'ya hutama amamiho. Aipa kanale yapiti vava kaikai hisia kanomofena Anumaya Koti'a hau ayamopafi nehaiye. ⁸ Anumaya Koti'a kosa helamatesia yana kayone yama'a tamamisia amuko'a haneanagino muki'a kanafina tamakaila tamaya hisia ya'ene muki'a vea'mogamina amaya hisia yama'aene kosa helamatesia yana alu ya alu yana tamamigahie.

⁹ Na'ama hisia yafena Anumaya Koti avopina mage huno kae-maleneane

“Nago'a vea'mo'ya afeno ya'amima omalene-sia vea'mogamina amamite amamite his-ageno fatago kava'amimo'a hanege hanege huno agola hanegahie.” huno kae-maleneane.

¹⁰ Anumaya Koti'a avina yana tamigeno anifiti nena hutegeno kavela falote higeno nelamino vaya'ma kaitama amaya hisaya yana kasago'ya tamamisigetama tamahau hutama vaya'ma kaisayana fatago kavatamimo'a ala hugahie. ¹¹ Anumayamo'a muki'a yana tamamisigetama muki'a kanafina veala amamigahae. Amamisayafene hutama tagai tayapi malenesageta ani vea'mogamina amamisuna yateti Anumaya Kotina musena hutegahae. ¹² Yisasina amaku'a aminaya vea'mogamina kosa heo'amatea yama amamiyanagi ani yama'agelomagi ani kava'ma haya yafena tusiya hu'ya Anumaya Kotina musena hutegahae. ¹³ “Kalaisi kanale mono kea havita lagupi malenone.” hutetama ani kea kanale'ya hutama akave maletama vaya kaikai nehutama amakai'ene nago'a vea'nene amaya hutama amave-lisage'ya “Tamage Anumayamo akave nehae.” hu'ya Anumaya Koti agia alisaga hugahae. ¹⁴ Alisaga hisageno Anumaya Koti'a tusiya huno kayone hulamatesia yafe amakesa havi'ya tamakaifena aluya huno nehamainage'ya “Anumayamo'a nago'ene tamaya hisie.” hu'ya nunamuna hugahae. ¹⁵ Anumaya Koti'a tusiya huno kayone hulateno

laminea kanohena hana'a huta musena hisune.
Ani yafe Anumaya Kotifena tusiya huta musena
hutesune hu'na nehue.

10

*Polo aliya ali haviya haya vaya'mogami
kenona'ami humaine.*

¹ Nago'a vaya'mo'ya nagaifena mage hu'ya nehae “Polo'a alule'ma maineno'a tagaifena tokiya'age ke nehianagi tagai taule'ma emaiyana koli huno kea nohie.” hu'ya nehayanagi nagaya Polo'na musetami nehugi Kalaisi'a ako huno kayone humainea avamete hu'na ako hu'na kayone kefiti mage hu'na tamahavi-negoe.

² Tamakaya mainesale'ma uva'yi hisuana tokiya'age ke huyafenagi menima omenesule ali fatago hiho. Ali fatago ohisayana nago'a vea'mo'ya nagaifena “Mopafi vea'mo'ya nehaya avamete kava nehie.” hu'ya haya vea'mogamina nagayama vinu'nahena ani veafena tokiya'age ke hugahue hu'na nehue. ³ Tamage tagaya mopafi vaya mainonanagi Satani'ene tuma hunana atafa laipa akave maleta tua nohune. ⁴ Mopafi mainaya vea'mo'ya kame hugahe nehaya avamete huta ati kevea alita kamea nohunagi Anumaya Koti'a agai'a tokiya ago tamineanagita Satani tokiya yama'a ali haviya huta ne'agasone. ⁵ Satanina agaseta Anumaya Kotifena havigema hune'ataya kemona ali haviya huteta vea'mo'ya amakai'ami amaugafama ali'ya haite'ya “Anumaya Koti kema ohavigahune.” hu'ya nehaya kemona agaseta hu-mainona keleti amakai'ami amaku amakesa Kalaisi aiyafinaga agai kema akave hisayafe

amatenone. ⁶ Amatenonafe tamakaya tamaku'a aiyahae hutama muki'a Kalaisi kea akave malesageta kema ne'atagaya veala anona'amia anamigahune.

⁷ Tamakaya amega yate ne'agae. Nago'a vea'mo'ya “Tagaya tamage huta Kalaisi vea'ne mainone.” hu'ya hisayana nagai'enena ani'a hu'na Kalaisina agai kano mainoa yafena lamakesa havi havi hutama maiho. ⁸ Tagaya kavatami mainonafe tamaku'a ali lokiya vailama-tesunafene huno Anumayamo'a tagaila hulatene. Tamaku'a ali haviya hisunafene huno huotatenegi Anumayamo'ma hulatenea yafe tusi'a muse hu'na veala hamanepauva yafena nagayea ohugahie. ⁹ Nagayama kae-maloo avona koli'ni'a hisaya kea hu'na avopina okaenoe. ¹⁰ Nago'a vea'mo'ya nagai'fena mage nehae “Polo'a avoma kaeno lahapaiyana tokiya'age huno keanelama-kianagi tagai taule'ma ne'eno'a fulu fulu kano emaineno koliti huno afa ke maino nehie.” hu'ya nehae. ¹¹ Na'a kema nehaya veala mani kea haviho. Avopiti'ma hua kene navayafiti'ma hua kenena nagoke augafa avamete ke haneanagi'na ani kavala hugahue.

¹² Hugahuanagi ani vea'mo'ya nago'amogamina maiya au'ava'ami agete'ya “Na'a nehaya vea'ne mainagi nagai au'ava yamo'a amakaila amakase'na mainoe.” hu'ya nehayanagi kanale amaku amakesa omalene. Omaleneanagi'na nagaya “Amakaya maiya au'ava yamona ago amakase'na kanale'ya hu'na mainoe.” hu'na hisuo? “Ifi nagaila ago nagase'ya kanale'ya hu'na mainae.” hu'na hisue? Na'a

avamete kavala ohugahue. ¹³ Anumaya Koti'a alisuna ali'yana ago tamiteno ani ali'yate tavalegeta tamakaitegama onana anima taminea ali'yake'ya ne'alita tagia alisaga hugahunanagi nago'a ali'yafena tagia alisaga ohugahune.

¹⁴ Ohugahunagi nago'a vea'nea omenageta tagaya hagoteta Kalaisifena kanale mono kea tamakaila tamahapai-mainonafe menia ani ali'yafena muse nehugi Anumaya Koti'a otaminesia ali'yafena tagia alisaga ohugahune.

¹⁵ Alu vaya'mo'yama ago'ma ali-mainesaya ali'yafena “Tagaiti ali-mainona ali'yane.” huta tagia alisaga nohunagi Yisasife havitama tamakupi malenaya yamo'a ala huno tokiya'age hisigetama tamakaipina nago'ene Yisasi mono kea tamahapaisunageno ali'yatimo'a ala hisie huta tametitita nehune. ¹⁶ Na'a hisigeta kotamia agasetu alu kote kote vaiyeta Anumayamo kema ohavinesaya vea'mogamina mo hamapaisuna yafe nelahaiye. Alu vaya'mogami ali'yatela tagia alisaga hisuna yafena notahaiye.

¹⁷ Anumaya Koti avopina mage hu'ya hu-mainayane

“Nago kanomo'a agima alisaga hugahena Anumayamo agige'ya alisaga hino.” hu'ya kae-malenayane.

¹⁸ Nago kanomo'a “Kanale kavake'ya nehua kano mainoe.” huno hisia kanomona Anumayamo aulela agia omalenegi Anumayamo'a agai'a nago kanomofena “Kanale kavake'ya nehia kanoe.” huno'ma hisigeno'a tamagelafa huno Anumayamo aulela agimo'a hanegahie.

11

Polo au'ava yamo'a havigema nehaya Aposolo vaya kana ohune.

¹ Ako hutama natalenetama mani kea haviho. Afa'a osi'a aifo ke kana ke hugahugi ako hutama maiya avamete nago'ene maiho. ² Anumayamo'a tamakaifema agesa nehavia avamete hu'na havi kapi o'visaya yafe nagesa ku'mo'a tusiya huno nehie. Nagi nagola hage-malenea munala alu vemo'a avayu hia yafe a'mona nefa'a tusi'a agaye nehia avamete hu'na nagaya Kalaisina alu aotage vea'ne'a maisae hu'na kava yagainelamatoe.

³ Osifa'vemo'a savale'ma huno Ivina ayevataga humainea avamete hu'ya nago'a vaya'mo'ya ayelama-vatagama hisagetamahena tamakesa ali fatago hutama Kalaisi akave'ma ne'valetila agai katela ne'ataletama tole lamakesa havitama Kalaisina tamakave'noma hutesaya yafena nagaila tusiya huno nagesa ku'mo'a nehie.

⁴ Yisasifena ago tamahapai-mainoa kea nago'a vaya'mo'ya nohagi Yisasifena havigea alu kema me lamahanepaiyana tamakaya “Tamage nehae.” hutama aup'a amakave nemalae. Nemalayanagi tagaya “Alu Aotage Avamula tamakupi emaigahie.” huta nehunanagi amakaya haya kemo'a mage hae “Alu kanomo avamula tamakupi emaine.” hu'ya hagetama aup'a muse nehutama tusi'a havi kava nehae.

⁵ Anima havige hu'ya ayemavataga haya vaya'moya tamage hu'ya nagaila onagasenae.

⁶ Aupa aupa kema hisua tokiya'nia omalegi aluya hu'na nagu nagesaene kano maine'na

muki'a kanafina kanale kava hu'na muki'a yana muki'a vea'mogami amaufina kea huhale'na nehugetama nehaviye.

⁷ Anumaya Koti kanale mono kema tamahapauvana “Nago'a monea namiho.” hu'na ohunoe. Tamavalesaga hisugetama tamakaya anale maisaya yafe nagai'nia ako hu'na mai kayone hu'na nayapiti ali'yana ali-mainoe. Ani'ama huana kefo ya humaino?

⁸ Tamakai tamaya hu'na mono ali'yana ne'aluge'ya alu kumate maine'ya Yisasina amaku'a aminaya vea'mo'ya nagaila naya hu'ya monea naminae. Namige'na ani monea ali'na musufayama nehia kanomo nehia au'ava kavala humaino? ⁹ Tamakaipina ali'yama aluana nago'a yani'ama omalege'na “Monea namiho.” hu'na tamahaviokenogi Masetoniati aya vaya'mo'ya muki'a yana naminae. Hagote'nama havimainoa nagesa haenaga'a ani'a hu'na tamakaifena “Monea namiho.” hu'na ohugahue. ¹⁰ Kalaisi kelamage kemo'a nagupima haneafene hu'na tamagea nehue. Monema o'ali'na afa ali'yama ne'alua yafena tusi'a muse nehuafe nagola Akaiya kotega mainaya vea'mo'ya ani musema nehua yamo'a kani'a tileonategahae. ¹¹ Na'a hige'na ani kavala nehue? Miya o'alua yafe tamakaifena nonahaiyo? A'ao tamakaifena nahau nayamopafima nenahaiya yana Anumaya Koti'a ago age-maine.

¹² Havigema tamahanepaiya vaya'mo'ya amakima ali'ya haigahena “Polo'ma nehia kava nehune.” hu'ya hu-mainesaya kea

ohavisaya yafe nagaya humainoa kavala huge huge hu'na tamakaipitila monea o'aligahue. ¹³ Ani vaya'mo'ya havigege'ya nehage'ya vea'mo'ya “Kalaisi Aposolo vaya mainae.” hu'ya hulatesayafene hu'ya Aposolo vaya kana nehu'ya veala ayemavataga nehae. ¹⁴ Na'ama hayana amakai'ami-omagi Satani'a agai'a hale yapima nemaiya ensole vaya kana huno ali hapaeteno vea'mogamina ayemavataga nehie. ¹⁵ Satani ani kavala nehige'ya agai'a ali'ya vaya'mo'ya ani'a hu'ya fatago yamo ali'ya vaya kana hu'ya ali'ya hapaesayana tamakaya atalia ohiho. Haenaga'a ani kava'ma nehaya yamona kefo miyana anona'amia aligahae.

Polo'a Aposolo ali'yatetila kasago'ya kana ya ali-maine.

¹⁶ Nago'ene tamahanepauve nagima ali'na hauva yafena nago'a vea'mogatama nagaifena “Agaya aifo kano maine.” hutama ohiho. Ani kema hinutamahena natalege'na osi kano'a afa'a nagima ali'na haisua kea haviho. ¹⁷ Ani nagima ali'na haisua kea Anumayamo'a “Mage huka huo.” huno ohunea kea nagai'ni'a anegi ne'na aifo vaya kana hu'na mani kea nehue. ¹⁸ Muki'a ma mopafi vea'mo'ya havigu kema nehu'ya amakai'ami amakima alisaga nehaya kava hu'na nagai'ni nagia alisaga hu'na mani kea tamahapaigahue. ¹⁹ Tamakaila kelamama-ki'na mage hu'na nehue tamakaya kanale havi havi'yatamima hanea vea'mogatama na'a higetama aifo'nafo vaya'mogami kea nehaviye? ²⁰ Ani vaya'mo'ya “Tagai ali'ya vaya

maiho.” hu'ya hagetama amakavela nemalae. Tamakaipitila monea ne'ali'ya tamakaila ali'ya haviya hu nelamate'ya amakai'ami amaugafa ali'ya nehai'ya tamakaifena “Afa vaya mainae.” hu'ya haya kehena kea ohutama amatalage'ya ani kavala mai'ya nehae.

²¹ Ani kava'ma haya kavala nagaya na'a nohuafe havi kava nehuo? Nagai'fena “Tokiya'a omale.” hutama nehao? Ani kema haya yafena nagayea nehugi nago'a vaya'mo'ya amakai'ami amaki alisaga hisaya kea nehayanagi nagayaenena ani'a augafa kea hu'na aifo vaya kana hu'na mani kea hugahue. ²² Ani vayala Hipalu* vaya'ma maisayana nagayaenena ani'a hu'na Hipalu kano mainoe. Amakaya Isaleli vea'mogami mono kema havisayana nagayaenena ani'a hu'na Isaleli vea'mogami mono kea nehavue. Amakaya Apalahamu aginagomo'ya mainesayana nagayaenena ani'a hu'na Apalahamu aginagomo'na mainoe. ²³ Amakaya Kalaisina ali'ya vaya'ama mainesayana nagaya amakaila amakase'na tusiya hu'na Kalaisi ali'yana ne'alue. Avo'nio nagima alisaga hua kea aifo ke kana ke nehue. Amakase'na nagaya tusiya hu'na Anumayamo ali'yana ne'alue. Amakase'na kasago'ya kanafina kina nopina mainoane. Kasago'ya kanafina ka'yo kevea naminayanagi amakaila osi'a amaminae. Nagaya kasago'ya kanafi falisua kavala huanagi amakaya nagayama hua kavala ani'a hu'ya ohunae. ²⁴ Yuta vaya'mo'ya faefu'a (5) kanafi alu ikate alu ikate teti naeni'a (39) haifula naminae. ²⁵ Tagufa (3) kanafi ka'yo

kevea naminae. Nago kanafi yafa ka'yotetila nahae-mainae. Tagufa (3) kanafi tipi kalefina mainogeno timo'a ai kalato kalato huno nahaesia kavala humaine. Ani tipi kalemo'a kofa-nafa huno haviya hige'na nago yosa atupale atafa huli'na nago kanaene kege'ene felugaene tipina mainoane. ²⁶ Muki'a kanafina vaiyatete nehugeno nahaesia kavake'ya falote hunatene. Timo'a hogino nahaesia kava'ene musufaya nehaya vaya'mo'ya nahaesaya kava'ene nagai anaga'mo'ya, Yuta vaya'ene, Yuta vea omainaya vaya'ene nahaesaya kavake'yana hunatenae. Ala kumate mainoge'yaene ka'me kotega mainoge'yaenena ali haviyana hunatenae. Tipi kalefima umainoana nahae-mainae. “Negafugata mainone.” hu'ya havige nehaya vaya'mo'yaene nahaegahena humainae. ²⁷ Tusi'a ali'yama aluana nafia nelege'na kasago'ya kanafina naula ofae'na nagala neleno tife'enena nage-maine. Kasago'ya kanafina kavefe'ene kena'nienefena omalegeno yasimo'a nahaige'na havi no mainoe. ²⁸ Amega naugafamo kana ya'ene muki'a kanafina Yisasife havi'ya elitaluma nehaya vea'mogamina kava yagaisua yafena nagesa havi havi nehugeno nagesa ku'mo'a nehie. ²⁹ Ani veapina nago'a vea'mogamina hamao otage fatage hige'na amakaifena nahauna humatenoe. Nago'a vea'mo'ya vea'mogamifena “Kefo yana hiho” hu'ya hage'ya Anumayamo katela ne'atale'ya kefo yama hage'na naipamo'a ata lemaine.

³⁰ Nagia ali'na haisua nagesama havisugeno'a

nago yafena fulu fulu kano mainoa yafe tamave-
ligahue. ³¹ Anumayatia, Yisasina Nefa'a, Anu-
maya Kotina, vaya'mo'ya agola agai agia alisaga
huge huge hisaya kanomo aufina nagaya havigea
hu'na nohue. ³²⁻³³ Nagaya Tamasigasi kumate
mainogeno sauve kanomo agia Aletasa'e kava
kano'amona hutegenonatafa hisaya yafe “Katela
yagaiho.” huno hige'ya yagai'ya maiyanagi
vaya'nimo'ya kupi nasaga hu'ya nate'ya ani
kuma'mona tokiya'age kegi'ya akalogapiti nofi
ali'ya ayete'ya ali kale'yo nehage'na fale'na
ayenefe hu'na umainoe.

12

*Anumaya Koti'a himona kana yapi Polona
muki'a yana aveli-maine.*

¹ Nagai'ni nagima alisaga hisuana naya
ohugahigi alu katela omaleneanagi'na nago
kene tamahapaigahue. Anumayamo'a himona
kana yapi naveli-mainea kea tamahapaisue.
² Navelia yamo'a fotini'a (14) kafu nagasetege'na
ani kavafena tamahapaigahe hue. Ani
kanafina Kalaisi'ene ailokae'na mainoanagino
Anumaya Koti'a ikapinaga navalege'na hauvana
nagu name'ene haimainesuo naugafaene
haimainesuo nagaya ohavinoe. Anumaya Koti'a
agai'age havimaine. ³ Havimainegi ikapinaga
navalege'nama hai-mainoa yafena havilinoe.
Nagu nameke hai-mainesuo ifi naugafamo'ene
hai-maineo ohavinogi Anumaya Kotike haviline.
⁴ Ikapinaga hai-va'yi hute'na alu'a augafa
avamete kea havite'na ani augafa kea ma mopafi

vea'mo'ya ohale'asinagi nagalu hu-malenea kea humaine. ⁵ Kanale muse yama'a navelia yafena muse nehu'na mani kea hugahuanagi nagai'ni'a nagia ali'na ohaigahue. Tokiya'nia omalegeno naya humaineafe muse nehu'na tamahanepauve. ⁶ Tamage nagaya nagia ali'na haisua kema hisua nagesama havule'asina havigu-nagu kea ohugahuanagi'na tamage hu'na hule'asinagi ani kea ohugahue. Vea'mo'ya ani kea havite'ya “Na'a augafa kano maine.” hu'ya hisaya yafena nonahaigi nemauva au'ava'niene nagai kema havisaya yafe'ene musena hisae hu'na nehue.

Neka'ya kana yamo'a Polona augafafi aye-maine.

⁷ Anumayamo'a tusi'a kanale yake'yama navelige'na agoa yafena Anumayamo'a mage hie “Havigu kaugafa alika haiyafene.” huno neka'ya ako'ya kana yamo'a naugafafina malegeno nagata aiye. Ani kana yamo'a Satanipiti falote higeno namineanagi'na naugafa ali'na ohaisuafene huno nagata yana namine. ⁸ Nagatama aiya yamo'a fanane hisia yafe tagufa (3) yupa Anumayamotega havige-mainoe. ⁹ Havigogeno kenona'nia mage huno nahapaiye “Ani yamo'a ha'no ohugahie. Nagaya kayone yani'aleti kaya hisugenos kosa hegatesigeka ali'yaka'a afa'a aligane. Kayamufa omaleneafe tusi'a tokiya'nia falote hugategahie.” huno hige'na ani kema havuafena nayamufa omalegeno Kalaisi'a tokiya namige'na musena humainoe. ¹⁰ Kalaisifena nagesa havi'na

ali'yama'a ne'aluafe nayamufa omalege'ya nagai nagia hu-haviya nehao kana yama falote hunateo ifi Yisasi kema nehua yafe nagaila ali haviya hunenatao havi no maisuo ani yamo'ma falote hia yafena naipamo'a haviya ohugahianagina afa'a muse hugahue. Nayamufa omalegeno Anumayamo'a tokiya'ama naminea yafena tusi'a muse nehue.

Polo'a Kolini vea'mogami amametiti alino lokiya vaimatesia yafe humaine.

¹¹ Tamakaya havi kava hutama nagai nagima alisaga ohayafene hu'na nagai'ni'a nagia alisaga nehu'na aifo vaya kana nehue. Anima havigege'yama hu'ya mono kema tamahane-paiya vayafena tamakaya “Kanale vaya mainae.” hutama nehayanagi nagaya afa ya kana kano mainoanagi ani vaya'mo'ya tamage hu'ya nagaila onagasenae. ¹² Onagasenagi tamage nagaya Aposolo kano mainoafe tamakai'ene maine'na ako hu'na tokiya'age avame yana hugetama “Tamage Aposolo kano maine.” hutama nage-mainae. ¹³ Nage-mainetamagi tamakaya mage hutama nehae “Alu Anumayamo anaga'ma kava ne'yagaiya avamete huno tagaila kava nohie.” hutama nehao? A'ao, nagoke avamete hu'na kava yagainelamatoe. Tamakaipina nagoke yana alu kavala humainoe “Monea namiho.” hu'na o'alinoa yafena “Havi kava hie.” hutama nehao? Ifi hanageke yama hu-mainesuana afa'a aigenatetama atalenateho.

¹⁴ Nagi tole kanale mo lamake-mainogi menia tagufa (3) molia kanale nago'ene mo

lamakesuafene hu'na nehuanagi tamakaipitila nago'a yana o'aligahue. Tamakai monehena nonahaiye afa'a tamakayama Yisasina tamaku'a amisaya yafe nenahaiye. Nafa'nemo'ya ita-af'o'amimogamife hu'ya monea alitalu hute'ya kave amamisaya ali'yana omalenegi ita-af'o'amimo'yage nafa'ne'amihena hu'ya monea hala'ya hute'ya kavela ne'amamiya yane. Nagaya ani'a hu'na nelamafa'na mainoanagi'na “Nafa'ne'nimogatama monea namiho.” hu'na ohugahue. ¹⁵ Nagaya tamaya hisugetama Yisasina tamaku'a amisayafene hu'na muki'a mone'niene tokiya'niene atalegahue. Atalesua'amo'ma nafima lesiana kanalele. Tamakaifena tusiya huno nahau nayamopafina nenahaiyanagi tamakaya nagaifena tamahau tamayamopafina notamahaiyo? hu'na nehue.

¹⁶ Nago'a vea'mo'ya nagaifena mage nehae “Tamage Polo'a fufu yatela tagai monea no'aligi savaleke'ya huno havigege'ya nehuno falakino kesi monetia ne'alie.” hutama nehae. ¹⁷ Nehayanagi nagaya hana'a hu'na ayelamavataga nehue? Nago'a vayala humatoge'ya ayelamavataga hu'ya tamakai monea ali'ya me naminao? A'ao ani kavala ohunae. ¹⁸ Tamakaya mainalega Taitasi'ene nago tafu-tagana'ene “Vi'o.” hu'na hunatoge'ana umaina'e. Taitasi'a mo ayelama-vataga huno tamakai monea ali-maineo? A'ao Taitasi'ene nagai'ene nago avamete huta'a kanale ta'agesale maineta'a ali'yana ne'alu'e.

¹⁹ Tamakaya manima kae-maloo kehena mage hutama nehao? “Tagai taufina agi alisaga

nehie.” hutama nehao? A'ao Anumaya Koti aufina Kalaisi'ene ailokae'na maine'na mani kea nehue. Nahau nayamopafi nenahaiya nenafugatama Yisasife hu'na tamaku'a ali lokiya vailamatesua yafe muki'a mani kea nehue. ²⁰ Na'afene koli nehu'na ma nagesa nehavue havigu tamakaya mainesalega uva'yi hisugetama onahaisia kava'ma hutama mainesayana naipa haviya hute'na kelamama-kisugetama nagaifena tamaipa haviya hinagetama havigu ke vaitama tamaipa ali haviya hisaya yamo'a tamahaivai yana falote hisigetama vaya okai yama hisageno'a tamakaitami tamaugafaheke'ya tamakesa havitetama alu kanomo agia ali haviya nehutama veafema havige nehaya kava hutama ala tamaki alitetama kefo yama hisaya yafenagi'na koli nehu'na mani avona kae'na nelamamue. ²¹ Havigu tamakaya mainesalega uva'yi hisuge'ya oni'ya'age kefo kava'ene moli hulite'ya nehu'ya kumai he kava'ene age hama'ye hu'ya kumai nehaya kava'enema nayoma nehaya vea'mo'ya amaku'a aiyahae ohu'ya ani kavake'ya nehisage'na me ne'amakesugeno tamakai tamaufi Anumaya Koti'a nagaye hisifa yana namisigeno naipamo'a haviya hisia yafena tusiya hu'na koli nagesa nehavue.

13

Kolini vea'mo'ya amametitile kava yagasae.

¹ Tole yupa tamakaya mainalega umainoanagi menia tagufa (3) molia kanale nago'ene visue hu'na nehue. Nago kanomo'a kefo yama

hisige'na kaiyekema hutesuana tole (2) vayalo tagufa (3) vea'mo'yao humainesia yama agete'ya hufalote hisayana kanalelagi'na kaiyekea hutegahue. ² Ago'ma tamakai'enema maine'na humainoa kea menia alule maine'na mani kea nago'ene hulokiya vai'na lamahanepauve. Haenagama tagufa (3) molia kanale tamakaya mainesalegama esua kanafina kefo yama humainaya vea'nene nago'a vea'mo'ya kefo yama nehaya vea'nenena kaiyekea humatete'na anona'amia amamigahue. ³ Tamakaya nagaifena “Kalaisi hapaiya ke nehio ifi agesafiti ke nehie?” hutama nehayanagi nagaya kefo yama nehaya vayafena tokiya'age ke hu'na me kemamakisugetama nenagetama “Tamage Kalaisiteti tokiya'age kea nehie.” hutama hugahae. Tamage Kalaisi'a tamakaipima ali'yama ali-maineana fulu fulu kanoa omainegi tokiya'aleti ali'yama'a ali-maineane. ⁴ Tamage Kalaisi'a fulu fulu vea'ne mainaya avamete huno maige'ya yafaga yosalela nili he'ya asaigeno fali-maineanagi menia Anumaya Koti tokiyaleti hetino maine. Tagayaenena fulu fulu vea'ne mainonanagi Kalaisi'ene ailokaeta mainonageno Anumaya Koti'a tokiya'a lamigeta agai'ene maineta agai tokiyaleti tamaya nehune.

⁵ Tamakaya tamakaitami lamaku'a agelama hutama lamakupi malenaya kea atafa hulitama mainao? Yisasi Kalaisi'a tamakupima mainea yafena havilinao? Tamakupima omainesiana agai'a veala tamagelafa hutama omainae. ⁶ Tamaku'a agelama hutetama ani'a hutama tagaila tagelama hutama lageho “Kanale

kava nehæe.” hutama hisaya yafe nenahaiye.
⁷ Nenahaiyafe “Kefo yana ohisæe.” hu'na nunamuna nehue. Tamakaya kanale kava hisage'ya nago'a vea'mo'ya nelamake'ya “Polo'a kanale ali'ya ne'alie.” hu'ya hisayafene hu'na nunamuna nohugi tamakaitamia kanale kava hutama maisæe hu'na nunamuna nehue. Nago'a vaya'mo'ya tagaifena “Anumayamo kea nehu'ya havi ali'ya ne'aliye.” hu'ya hisayana kanalele.
⁸ Anumaya Koti kelamage kemo'a “Ohiho.” huno humainesia kea ohugahunagi agai kea akave malesuna vaya mainone. ⁹ Tayamufa omalenagetama tamakaya mai lokiya vaitama mainesaya yafena muse nehune. Fatago hutama tokiya'age hisæe huta nunamuna nehune.
¹⁰ Tamakaya mainalega uva'yima hisuana havigu Anumaya Koti'ma naminea tokiyaleti kelamama-kiyafene hu'na menia alule maine'na mani avona kae'na nelamamugi tamaku'a aiyahæe hiho. Anumaya Koti'ma naminea tokiya tamakaila alino haviya hulamatesia yafe onaminegi tamakaila tamaku'a ali'na tokiya vailamatesuafe namine.

Polo'a huno falu fala humatenea ke.

¹¹ Nafu'nagana-gatama nagaya hua kemo'a ha'no hugahe hue. Fatago hutama maisaya yafena tamakesa havi havi hutama nagayama ne-hua kea havilama hiho. Nagoke tamaku tamakesale kea o'vaitama tamaipamo falu nehinagetama maiho. Na'a nehisageno hau ayamopafi nehainageno kanale falu yamona aepa'amo'a Anumaya Koti'a tamakai'ene maigahie.

¹² Tamakaya nagoke nagoke'mo-gatama tamayana o'ami a'ami hutama maiho. Muki'a Anumaya Koti anagala nagai'ene maine'ya tamakaifena “Felugae.” hu'ya hu falu fala hunelamatae.

¹³ Anumayati Yisasi Kalaisi'a kayone hulamatesia yama'a tamaminageno Anumaya Koti'a tamakaifena hau ayamopafi nehainageno Alu Aotage Avamu'mo'a tamakai'ene tokaeno maisigetama nagopi maisae hu'na nunamuna nehue.

Ke'nia male ha'no hie.

Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 11 Nov 2022 from source files dated 30 Nov 2021

55807fd5-1005-5405-89da-5533a7950c65